



O curtocircuíto entre o goberno en minoría (PP-CDL) e a oposición en Gondomar agravouse trala solicitude de dimisión ao alcalde Fernando Guitán presentada no apartado de Rogos e preguntas polo portavoz de ANOVA, Antonio Araújo. Na mesma sesión o portavoz socialista Paco Ferreira sacou adiante unha moción que obrigará a Guitán a comparecer no vindeiro mes de abril ante o pleno. Ambos feitos fundamentáronse na recente [imputación xudicial do rexedor por un presunto caso de prevaricación administrativa](#) en relación á adxudicación do servizo de conservación de zonas verdes do concello á empresa Jarma S.L., sen concurso público previo. A empresa pertencería ao fillo dun vogal da xestora do PP local.

Neste clima transcorreu a sesión plenaria do pasado xoves onde a oposición tamén botoulle abaixo ao goberno unha modificación de crédito de 53.000€ para complementar o orzamento das obras do auditorio municipal Lois Tobío.

ANOVA pídelo a dimisión ao alcalde.

Antonio Araújo: “Señor alcalde, hoxe traía a este pleno unha ducia de preguntas e varios rogos pero, como vostede responde como lle dá a gana e facendo caso omiso de que se propón nelas, decidín converter todo iso nun único rogo: Rógolle que dimita!”

A solicitude de Araújo non recibiu resposta verbal algunha do alcalde Fernando Guitán na sesión, nin de momento o rexedor emitiu pronunciamento algún ao respecto.

Para o concelleiro nacionalista o alcalde debe dimitir “por respecto a esta Corporación Municipal e sobre todo, por respecto ás veciñas e veciños de Gondomar votaran ou non ao PP.” Durante a argumentación do rogo, Araújo afirmou que a decisión debe ser tomada por Guitán de xeito inmediato independentemente do percorrido e da resolución xudicial da súa imputación. “Vostede fixo un uso incorrecto de cartos públicos contratando (sen contrato) a unha empresa de xardinería propiedade dos seus amigos do PP” sinalaba o texto lido por Araújo.

Non hai moción de censura no horizonte político de Gondomar.

A pesar da tensa relación existente entre goberno e oposición, nin nacionalistas nin socialistas están a prol de presentar unha moción de censura que obrigue a Guitán a abandonar a condución do Concello de Gondomar. Se ben dende ambas agrupacións veñen formulando publicamente pedidos de dimisión ao rexedor dende que tomou estado público a súa imputación, diversas razóns políticas afastan a moción de censura do horizonte político no municipio.

En primeiro lugar, non existe un plan nin a intención de facelo, que posibilitara un goberno alternativo formado polo conxunto das agrupacións actualmente na oposición: ANOVA, PSOE, IXG e mais o edil díscolo do PP, Eladio Costas. E por outra banda, a nova lexislación obriga a unha maioría especial cando un dos concelleiros mocionantes foi electo pola agrupación de goberno, como é a situación de Eladio Costas. Nese senso, os nove votos dos opositores ao bipartito non serían suficientes, necesitado nesta hipótese que outro edil do goberno acompañase a iniciativa, suposto sen viso de realidade algunha ata de agora.